

ՀՈԴՎԱԾՆԵՐ ԵՎ ՀԱՂՈՐԴՈՒՄՆԵՐ СТАТЬИ И СООБЩЕНИЯ

ԳՐԻԳՈՐ ՆԱՐԵԿԱՅՈՒ
«ՄԱՏԵԱՆ ՈՂԲԵՐԳՈՒԹԵԱՆ» ԵՐԿԻ ԺԱՆՐԱՅԻՆ ԲՆՈՒՅԹԸ

Ա. Ա. ՂԱԶԻՆՅԱՆ

Նարեկացու Մատյանի ժանրային բնույթը հատուկ քննության հարց չի դարձել: Իրավացի չէինք լինի, սակայն, եթե ասեինք, թե գրականության պատմաբաններն ու տեսաբանները չեն փորձել պատասխանել այդ հարցին: Բայց նրանք տվել են այնպիսի պատասխաններ, որոնք իրականում ոչ թե հարցը լուծել, այլ ավելի են խճճել: Բանն այն է, որ առհասարակ հստակություն չկա ժանրերի և նրանց տարատեսակների գիտական բնութագրման մեջ: Խոսքը գրական հիմնական սեռերի՝ էպոսի, լիրիկայի և դրամայի մասին չէ, այլ վերաբերում է յուրաքանչյուր սեռի տեսակներին: «Ժանրի բմբուխն հարցում միասնություն չկա»¹, — գրում է է. Զրբաշյանը: Իսկ թե «ինչով են ժանրերը տարբերվում մեկը մյուսից, ընդհանուր ինչ սկզբունքներով պետք է տարբերակել և դասակարգել նրանց», — այս հարցի լուծումը բախվում է մեծ դժվարությունների»², — գրում է Գ. Պոսպելովը: Ձծավալվելով, ասենք միայն, որ ժանրերի տարբերակման սկզբունքը պետք է որոնել նրանց տիպաբանական հատկանիշների մեջ՝ ձևի և բովանդակության, կառուցվածքի և գեղարվեստական պատկերի ստեղծման տարրերի մեջ: Ժանրի տիպաբանական հատկանիշները ևս քարայցած չեն, այլ ունեն հարաբերական կայունություն:

Մատյանի ժանրային պատկանելության խնդիրը ձևակառուցվածքային խնդիր չէ, այլ ունի ստեղծագործական հոգեբանության և գրական կողմնորոշման նշանակություն: Ասել, թե Նարեկացին աղոթք է գրել՝ նրան կապում ենք կրոնական հոգեբանության և միջավայրի հետ, ասել, թե ողբ է գրել՝ նրան կապում ենք կյանքի և ժողովրդի հետ: Այլ կերպ ասած՝ ժանրային բնութագիրը դառնում է բովանդակության բացահայտման, հեղինակի դեղագիտական կողմնորոշման բանալի:

Մատյանի ժանրային մեզ հայտնի ամենահին բնութագիրը տվել է Ներսես Լամբրոնացին (1155—1198 թթ.): Պահպանվել է 1173 թ. Լամբրոնացու գրած Նարեկացու վարքի ինքնագիր օրինակը³: Խոսելով Նարեկացու գրական ժառանգության մասին, Լամբրոնացին հիշատակում է նաև նրա Մատյանը. «...սկիզբն արար եւ խաւսեցաւ զգիրս աղաւթից ըստ հայցման խնդրոյ կրանաւոր եղբարց բանս Ղն»⁴: Նա Մատյանը կոչում է գիրք աղօթից, որ այլ կերպ կարող էր ասվել աղոթագիրք, աղոթամատյան: Այդպես կոչելու համար Լամբրոնացին հիմք է ունեցել: Մատյանի ընդարձակ խորագրում Նարեկացին իր երկը կոչել է մատենան ողբերգութեան, բայց նրա նպատակը տեսել է նաև

1 է. Մ. Զրբաշյան. Գրականության տեսություն. Երևան, 1972, էջ 355:

2 Г. Н. Поспелов. Теория литературы. М., 1978, с. 230.

3 Մաշտոցի անվ. Մատենադարան (ՄՄ), ձեռ. № 1568, էջ 119ա: Տե՛ս նաև՝ Գարեգին Ա. Կաթողիկոս. Յիշատակարանը ձեռագրաց. Անթիլիաս, 1951, էջ 142—143:

4 Նույն տեղում, էջ 142:

այն բանի մեջ, որ նա կարող է լինել «առիթք արտասուաց, պատճառք աղաւթից»։ Եվ ոչ միայն սա։ Բուն բնագրում նարեկացին գրում է, որ ինքը աղոթքների ձեռով ոմանց համար աղերսանքներ է գրել, ոմանց համար էլ՝ բարի խորատներ, որպեսզի նրանք իր խոսքերով մշտապես դիմեն աստծուն։

Որոց ոմանց աղերս աղաւանաց և ոմանց խրատ բարեաց՝
Առ զէմս աղաւթից այսու մատենիւ մատակարարեցի...

(Բան Գ, գ)

կամ՝

Եւ որ որ քնթերցցի գայս աղերս ձայնի՝
Սաղթանաց զոչման՝ աղաւթից հայցման...

(Բան Դ, ե)

և, վերջապես,

Գրեսցե՛ս աղաւթս մշտամատուցս գայս նորընծայ տառ ողորմաղերս
Թախծազին ձայնի ողբերգարկութեան այսր մատենիւ

(Բան ՀԱ, դ)

Սա էլ հիմք է դարձել, որ Մատյանը դարեր շարունակ հիշատակարաններում կոչվեր զիւր աղօթից, աղօթից մատենան, աղօթական գիրք, կտակ մաղթանաց, աղօթամատուց գիրք և այլն։ Ըստ այս ավանդույթի՝ Մատյանի առաջին տպագրությունը (Կ. Պոլիս, 1700—1702 թթ.) ունի «Գիրք աղօթից սրբոյն Գրիգորի նարեկացույ հոգեկիր հոգևորի» խորագիրը, որը պահպանվել է մի շարք վերահրատարակությունների մեջ⁵։ Թվում է՝ տրամաբանական է Մատյանն անվանել աղոթքների գիրք, աղոթամատյան և, իսկապես, այդպես էլ կոչել ևն Հ. Նալյանը⁶, Գ. Ավետիքյանը⁷, Ղ. Ալիշանը⁸, Գ. Զարբհանալյանը⁹, Թ. Գուշակյանը¹⁰, Ի. Քելիշյանը և շատ ուրիշներ։ Բանն այն է, որ դեռևս քրիստոնեության հաղթանակի առաջին դարերից սկսած՝ եկեղեցու հայրերը համոզված էին, որ մարդու ողջ հոգևոր էությունը, նրա հոգու բոլոր ուժերը, նրա ողջ հուշական և զեղարվեստական փորձը պետք է ուղղված լինեն աստծուն ծանաչելու, նրան մոտենալու, նրա հետ հաղորդվելու, նրա հետ ձուլվելու նպատակին։ Ուստի նրանց համար գեղարվեստական ստեղծագործության բարձրագույն ձևը դառնում է աղոթքը, սրտի խորքերից բխած խոսքն առ աստված։ «Աղոթքը դառնում է քրիստոնեական գրական ստեղծագործության կարևոր ժանրը։ Նա ակտիվորեն ազդել է վաղ քրիստոնեական և միջնադարյան արվեստի բոլոր տեսակների և ժանրերի բնույթի վրա, որոշել պաշտամունքային ողջ գործողության առանձնահատուկ, աղոթական տրամադրությունը»¹¹, — գրել է Վիկտոր Բիշկովը՝ ուշ անտիկ շրջանի գեղագիտությանը նրվիրված իր մեծարժեք աշխատության մեջ։ Բայց եթե «աղոթքի մեջ ավելի լավ է ունենալ սիրտ մը առանց խոսքերու, քան թե խոսքեր առանց սրտի»¹² կամ,

5 Տե՛ս Հայկական նոր մատենագիտություն և հանրագիտարան նոր կյանքի, կաղմեց Կ. Արսեն Ղազարոս Ղազինյան. հ. Ա, Վենետիկ, 1909/1912, էջ 471—499։

6 Հ. Նալյան. Մեկնութիւն աղօթից և ներբողինաց սրբոյն Գրիգորի նարեկացույ. Կ. Պոլիս, 1745։

7 Գ. Ավետիքյան. Նարեկ աղօթից համառօտ և զգուշաւոր լուծմամբ, բացալատեալ միանգամ և այժմ երկրորդ անգամ յաւելուածով. Վենետիկ, 1827, էջ Ժա և հտ.։

8 Ղ. Ալիշան. Հայապատում. Վենետիկ, 1901, մասն Ա, էջ 88։

9 Գ. Զարբհանալյան. Պատմություն հայերեն դպրության. Վենետիկ, 1865, հ. Ա, էջ 443։

10 Թ. Գուշակյան գրել է. «Աղոթքի գիրք մը, բառին ամենն աղնական առումովը, ու նույն ատեն գրական հրաշակերտ մը. մեր սփոփանքը և մեր հպարտությունն է ան» (Նարեկ աղոթամատյան սուրբ Գրիգորի նարեկացվո, արդի հայերենի վերածննդ թորգոմ եպիսկոպոս. Կահիրե, 1926, էջ 7)։

11 В. В. Бычков. Эстетика поздней античности. М., 1981, с. 208—209.

12 Գր. Սաֆարյան. Գրիգոր Նարեկացի և իր նարեկ Աղոթամատյանը. Ֆրեզնո, 1951, էջ 21։

Նարեկացու արտահայտությամբ՝ «զհառաչ հոգւոյ եւ զազդումն շնչոց հեծութեան» (Բան Ի, գ), և որքան էլ աստծուն հաճելի լինի սրտի լուծյան ձայնը, որովհետև նա «գործովք միայն գրաւի եւ ոչ ստեղծաբանութեամբ կաշառի» (Բան Բ, ա), ապա սա վերաբերում է լուռ աղոթարարին և ոչ թե բանաստեղծին: Գրավոր աղոթքը, աստծուց առաջ, գրված է մարդու համար: Ուստի նա պետք է գրավի հենց իր բանաստեղծականությամբ, գեղարվեստական ուժով ներգործելու համար մարդկանց հուզաշխարհի և հոգեբանության վրա:

Նարեկացին օգտվել է աղոթքի՝ իբրև գրական տեսակից, սակայն Մատյանը աղոթքների գիրք չէ: Աղոթքը հավատացյալի հաղորդվելն է աստծու հետ, նրա անպատասխան երկխոսությունը աստծու հանդեպ տաժած երկյուղի և բարեպաշտության, հավատի և հույսի մասին՝ նրանից շնորհ ու բարիք հայցելու և շարք խափանելու ակնկալությամբ: Հստ ալսմ էլ աղոթքը սովորաբար երեք մաս ունի՝ ուղերձ (դիմում կամ օրհնություն), բուն նյութը (խոստովանություն կամ պատում) և խնդրվածք (մաղթանք կամ բարեխոսության աղբյուր): Աղոթքը, ավելի պարզ ասած, կարճ խնդրվածքն է, որին բնորոշ չէ ներքին միասնությունը: Մինչդեռ Մատյանին հատուկ է զգացմունքների և մտքերի, տրամադրության և գիտակցության ներքին միասնություն: Մատյանի յուրաքանչյուր գլուխ անկախ է հարաբերականորեն: Իրականում տարբեր գլուխների միջև կա ներքին միասնություն: Նրանք արձագանքում են իրար, հաջորդում միմյանց՝ չխախտելով անցման կապը: Ներքին այդ միասնության մեջ բանաստեղծի մի հոգեվիճակ նախապատրաստում է մյուսը: Այսպես՝ առաջին գլուխն սկսվում է ողբահեծ հառաչանքով, որ ծնվել է մեղքի գիտակցման և անեղ դատաստանի երկյուղի ծանր ապրումներից, ապա երկրորդ գլխում անցնում է իր անձի դատապարտությանը՝ հողին մատնելով անփարատ հուսահատության, բայց ավարտում է աստծու գթասիրությանն ապավինելով և հայցելով նրանից հոգու նորոգություն: Երրորդ գլխում՝ արդեն տրամուլյունում ու երկյուղը փարատած, զվարթ հոգով օրհնեցում է աստծուն, ապա անցնում իր երկի նպատակի շարադրմանը և ավարտում բանաստեղծական շնորհի սրտահույս հայցմամբ: Նվ իսկապես, այստեղ միայն աղոթքի տարրեր կան, մինչդեռ իրականում նրանց ներքին միասնությունը շաղկապված է թե՛ քնարական նույն տրամադրությամբ և թե՛ հոգեվիճակների անցման բնականությամբ: Նարեկացու տարակույսն ու կասկածը, վհատությունն ու հույսը, տագնապն ու տենչանքը, հավատն ու սերը ստեղծում են հույզերի մակերթացության այն կենդանի հորձանքը, որ խոր լարվածություն է հաղորդում երկին: Սատյանը համակված է բանավիճային հղոր կրթով ու շնչով:

Մատյանի կառուցվածքը միատարր չէ: Նարեկացին հաճախ է դիմում ընթերցողին, ստեղծելով կենդանի հաղորդակցման անմիջականություն: Մի շարք գլուխների մեջ (Գ, Զ, ԺԲ, ԻԲ, ԼԼ, ԾԴ, ԿԶ, ՀԱ, ՀԲ, ԶԸ) նա խոսում է իր երկի նպատակի և նշանակության մասին, մի քանի գլուխների մեջ (ԺԵ, ԻԵ, ԻԶ, ԻԷ, ԼԵ, ԽԷ, ԿԸ)՝ իր խոսքի ոճը փոխելու, ժողովրդական ողբի ձևերին հետեւելու մասին, առենք նաև, որ ընդհանուր քնարական ոգուն շատ քիչ են մերվում ԼԳ, ԼԴ, ՀԵ, ՂԲ և ՂԳ գլուխները, որոնք դավանաբանական-մեկնաբանական բնույթ ունեն:

Մատյանը հայտնի է նաև Նարեկ անունով: Հնագույն վկայությունը հայտնի է Նարեկացու վարքի մի տարբերակից, որ տեղ է գտել Վանական վարդապետի աշակերտ Տեր Իսրայելի խմբագրած Հայսմավուրքում¹³: Կա Հայսմավուրքի հնագույն մի ընդօրինակություն՝ գրված 1309 թ.: Նշանակում է՝ Նարեկ անվանումը գալիս է XIII դարի երկրորդ կեսից: Ահա այդ վկայությունը: «Եւ օր քան զօր առաւելեալ ի մշտամոռնչ աղօթս՝ յօրինեաց զհրաշալի գիրս աղօթից, որ յանուն տեղւոյն Նարեկ կոչի»¹⁴: 1774 թ. Կ. Պոլսի տը-

¹³ Տե՛ս Յասմաուրք ըստ կարդի ընտրելագոյն օրինակի Յայսմաուրաց Տէր Իսրայելի. Կ. Պոլիս, 1834, «Յառաջաբան»:

¹⁴ Նույն տեղում, էջ 99:

պագրությունը խորագրված է՝ «Նարեկ. Գիրք աղօթից սրբուն Գրիգորի Նարեկացու Հոգևոր Հոգևորի», իսկ 1789 թ. Վենետիկի տպագրությունը՝ «Սրբուն Կորն մերոյ Գրիգորի Նարեկացու Գիրք աղօթից, որ կոչի Նարեկ»: Վենետիկի 1840 թ. հրատարակության տիտղոսաթերթն այսպես է՝ «Գրիգորի Նարեկայ վանից վանականի Մատենաճոգութեան»: Ընդգծված բառերը Նարեկացու երկի խորագրից են և կարծում ենք ավելի ճիշտ են արտահայտում Մատյանի ժանրային բնույթը:

Մատյանի ժանրային բնույթին առաջին անգամ քիչ թե շատ հանգամանորեն անդրադարձել է Ա. Չոպանյանը 1895 թ. գրած «Գրիգոր Նարեկացի» ուսումնասիրության մեջ: Գտնելով, որ «ամբողջ միաստիկականություն է այդ գործը, և ամբողջ քնարերգություն», նա Մատյանը կոչում է «միաստիկականության ցավագին վեպ մը», ուր վեպը պարզապես համարվեց է երկ բառին: Չոպանյանն իրավացի է, որ «Նարեկացին գրեթե միշտ կնախընտրե ներբողին քնարական ձևը», որ նրա խոսքը «աստվածաշնչական օրհներգության կամ նախնական բանաստեղծությանց գովաբանական աղոթքի ձևը կառնեն»¹⁵: Այլ կերպ ասած՝ Մատյանը միատարր ժանրային ստեղծագործություն չէ, այլ նրա մեջ միահյուսվել են տարբեր ժանրեր՝ աղոթք, ներբող, դրվատ, օրհներգություն և այլն:

Մ. Աբեղյանը գտնում է, որ Մատյանը «ապաշխարության երգ է և դարգացումն է ապաշխարության հոգևոր երգերի և ընդհանրապես «ողորմեա» կոչված շարականների: Դա էլ իրոք այն տխուր ու լալահառաչ հոգևոր երգերի կատարելատիպն է, միայն ինքնահաստատվ ձևով»¹⁶: Աբեղյանն անուն չի տվել այդ «ինքնահաստատվ ձևին»: Իսկապես, Մատյանի քնարական հերոսի ինքնաբացահայտման ակունքները գալիս են ապաշխարության շարականներից:

Ըստ Ստ. Մալխասյանի Մատյանը «միանգամայն ինքնուրույն բանաստեղծություն է, իսկ նրա մտահղացումը, ներքին իդեան՝ բոլորովին նոր ու միակն է աշխարհի գրականության մեջ»¹⁷: Մալխասյանը Մատյանը համարում է ողբերգություն՝ «իբրև ողբերի երգ կամ երգված ողբ: Բայց այս բառը, չորս այժմյան նշանակությամբ, իբրև դրամա, նույնպես շատ լավ հարմարում է գրքին»¹⁸:

Ս. Մկրչյանը Մատյանը համարում է «լիրիկական մեծ պոեմ»¹⁹. «Այն ընդհանուր գրականության մեջ եղած լիրիկական ժանրի սլոմեններից թերևս ամենալիրիկականն է, որովհետև պատմողական-սյուժետային տարրը ընդհանուր կառուցվածքի մեջ բոլորովին բացակայում է, իսկ եթե առանձին գրչությաններում էլ երևան է գալիս՝ աննկատելի լինելու շափ քիչ տեղ է բռնում»²⁰: Մատյանը քնարական խոհափիլիսոփայական պոեմ է համարում նաև է. Ջրբաշյանը. «Համաշխարհային գրականության մեջ դժվար է ցույց տալ մի ուրիշ այսքան մեծ ծավալի զուտ քնարական պոեմ, որը միաժամանակ այդքան լեցուն լինեի ներքին շարժմամբ, հոգեբանական պատճառաբանված անցումներով»²¹: Ժանրային այս բնութագիրը ստացել է միջազգային ճանաչում: Բայց ինչպես Հոմերոսի «Իլիականը» պոեմ է անվանվում, մինչդեռ դա համարվեց չէ նրա ժանրային էությանը, այնպես էլ Նարեկացու Մատյանը, լինելով եզակի և անզուգական գործ, վերապահությամբ միայն պետք է անվանել քնարական պոեմ: Մատյանի մասին կարելի է ասել ևս, ինչ ասել է Տոլստոյն իր «Պատերազմ և խաղաղություն» էպոպեայի մասին. «Ի՞նչ է «Պատերազմ և խաղաղությունը»: Դա վեպ չէ, առավել ևս՝ պոեմ չէ, է՛լ առավել՝ պատմական

15 Ա. Չոպանյան. Երկեր. Երևան, 1966, էջ 262, 283:

16 Ս. Աբեղյան. Երկեր. Կ. Գ. Երևան, 1968, էջ 620:

17 Ստ. Մալխասյան. Մատենագիտական դիտողություններ. Երևան, 1961, էջ 229:

18 Նույն տեղում, էջ 230:

19 Մ. Մկրչյան. Գրիգոր Նարեկացի. Երևան, 1955, էջ 168:

20 Նույն տեղում, էջ 173:

21 Է. Ջրբաշյան. Դեղագիտություն և գրականություն. Երևան, 1983, էջ 107:

քրոնիկ չէ: «Պատերազմ և խաղաղությունը» այն է, ինչ ցանկացել և կարողացել է արտահայտել հեղինակն այն ձևի մեջ, որտեղ արտահայտված է դա»²²: Գեղարվեստական մտահղացումը չի կարող մարմնավորվել այլ կերպ, քան գրական որևէ ժանրի մեջ: Եվ ինչ ժանր էլ լինի դա, նրա ձևականացվածության հատկանիշների մեջ ավանդականը զուգակցվում է նորի և անհատականի հետ, կայուն հատկանիշը փոխանցվում է նորի: Ավելի բացահայտ է դրսևորվում սեռի պատկերը: Ժանրատեսականները կարելի է շփոթել, բայց սեռերը՝ երբևէ: Ահա թե ինչու Մատյանը որքան էլ ուրույն բնույթ ունենա, այնուամենայնիվ, քնարական ստեղծագործություն է: Իբրև այդպիսին նա ավանդական քնարական ձևերից ոչ թե սահմանազատվում է, այլ, ընդհանրապես, խառնվում և խորացնում է դրանք, ձգտելով անխառն քնարականության: Քնարական սեռի պատկերն այնքան հստակ է նրա մեջ, որ Չոպանյանը գրել է այսպես. «Իր աստվածաբանությունն իսկ տրամաբանող աստվածաբանությունն էր չէ, այլ քնարական մտածաբանությունն էր»²³: Կա մի կարևոր հանգամանք ևս: Ինչ ժանրեր էլ որ օգտագործել է Նարեկացին իր «միագո իրի հրաշակերտությունը» ստեղծելու համար, դրանց մեջ հիմնականը ողբի ժանրն է, և Մատյանն այլ բան չէ, քան ողբերգի ցիւրլ, ողբերգի երգ: Ստեփանոս Նաղարացուն այն ուռներեն թարգմանել է էլեգիա՝ եղբերգություն²⁴:

Մատյանի գեղարվեստական ձևը նախապատրաստվել է դարերով: Նարեկացին միայն հիմք և ելակետ է ընդունել ողբը՝ ստեղծելով գեղարվեստական ինքնատիպ ժանրի երկ: «Գեղարվեստական տեսունակության նոր ձևերը նախապատրաստվում են դանդաղ, դարերի ընթացքում, — գրել է Մ. Բախտիյանը, — դարաշրջանը միմիայն օպտիմալ պայմաններ է ստեղծում նոր ձևի վերջնական հասունացման և իրականացման համար»²⁵: Ողբերգի գիրք գրելու համար Նարեկացու դարաշրջանն իրոք ստեղծել էր արգավանդ հող: Դա բեկման դարաշրջան էր: Հայաստանը թևակոխել էր ավատատիրական հարաբերությունների դարգացման նոր փուլ: Հասարակական, տնտեսական այս վերելքը հարուցում էր նոր կենսազգացողություն: Հումանիստական աշխարհայեցողությունը վերընթացում էր իր առաջին շրջերը: Բնականաբար, սրվում էին դասակարգային հակամարտությունները: Երկիրը ցնցվում էր թոնդրակյան ապստամբությունից: Մ. Արևելյանի բնորոշմամբ՝ «կրոնական էր այն դարի իշխող ոգին և ուղղությունը ոչ միայն մեր մեջ, այլև ընդհանուր աշխարհում»²⁶: Մարդու բարոյական արժեքի գնահատման չափանիշը հավատն էր, աստծու նկատմամբ ունեցած նրա վերաբերմունքը: Անհատի ներաշխարհը ծվատվում էր հոգու և մարմնի, սատանայի և հրեշտակի, մեղքի ու քավության, դրախտի ու դժոխքի և նման այլ պատկերացումների հարուցած մտքերից ու զգացմունքներից: Եկեղեցին ձգտում էր հաստատուն պահել աշխարհուրացության իր գաղափարախոսությունը: Նա աղանդավորական մոլորություն էր հայտարարում ծլարձակող հումանիստական նոր աշխարհայեցողությունը, որը հակաեկեղեցական ուղղություն ուներ և փորձում էր քրիստոնեական վարդապետության սկզբունքները վերակերտել հակառակ հիմունքների վրա՝ երկնային անգո վալելի փոխարեն փարվելով երկրային հասունություն: Գաղափարախոսական այս հակամարտությունը Նարեկացու դարաշրջանի էական գիծն էր:

Վերնագիրը յուրահատուկ բնույթ ունի միջնադարի դրականության մեջ: Իբրև կանոն, այն գաղափար է տալիս ա) երկի բովանդակության, բ) գրական տեսակի, գ) հեղինակի անձի, դ) գրության ժամանակի և ե) այն անձի մասին, ում խնդրանքով կամ պատվերով գրվել է այն: Սա ընդունված ավանդույթն է,

22 Л. Н. Толстой о литературе. М., 1955, с. 115.

23 Ա. Չոպանյան. նշվ. աշխ., էջ 273:

24 С. т. Назарянц. Беглый взгляд на историю гайканской литературы. Казань, 1844, с. 32.

25 М. Бахтиян. Проблемы поэтики Достоевского. М., 1979, с. 43.

26 Մ. Արևելյան. նշվ. աշխ., էջ 567:

և Մատյանի խորագիրը բավարարում է հինգ կետերից չորսին²⁷։ Բովանդակությամբ Մատյանը ըստ նարեկացու՝ ապաշավանքի օգտակար խոսքերի բաղմամբխանձ գրվազներ են, հոգեշահ խրատների և զղջական կանոնների գիրք, մեղքերի խոստովանություն, հոգեկան անբուժելի վերքերի զորավոր սպեղանի, անտեսանելի ցավերի ներազդող դեղ և այլն։ Այն գրվել է ճշնակյաց անապատականների, կուսակրոն հայրերի և վանական եղբայրների խնդրանքով՝ 1002 թ.։ Իբրև գրական տեսակ՝ այդ երկը ողբերի մատյան է, ողբերի երգ, մաղթանքների և աղոթքների կտակ։ Եվ, վերջապես, Մատյանի հեղինակն է նարեկա վանքի վանական Գրիգոր նարեկացին։

Խորագրում նարեկացին իր երկը կոչում է «մատեան ողբերգութեան»։ Նարեկացին մեկ անգամ չէ, որ բուն բնագրում իր երկը կոչում է մերթ ողբերգութուն» մերթ՝ ողբերի մատյան, մերթ՝ ողբերգության կտակ, զուգորդելով դա մերթ աղոթքների և մաղթանքների, մերթ էլ՝ խոստովանության հետ։ Մատյանը նա համարում է նաև «համայնապատում խոստովանութիւն»։ Խոստովանությունը, սակայն, ժանրային հատկանիշ չէ։ Դա երկի այն ներքին ոգին է, որ խոր հուզականություն և ներգործման հզոր շունչ է հաղորդում նրա միասնությանը։ Նարեկացու բնութագրմամբ՝ Մատյանը ողբերի գիրք է, ողբերգության գիրք է։

Շնորհա՛ կատարել ի քոյդ հաճութիւն, արհնեալդ ի կամաց,
Զսկզբնաւորեալ մատեան մաղթանաց այսր ողբերգութեան
(Բան Բ, Բ)

Կամ՝

Ե. արդ՝ քանդի ի գլուխ կատարման հասեալ
Սակաւամասնեայ կտակի այսր ողբերգութեան,
Արա՛, Տէր, վախճան դադարման առնու...
(Բան Զէ, ա)

Նման վկայություններ կան մի շարք այլ գլուխներում ևս. Գ (Բ, դ), Թ (ա), ԼԳ (Բ), ԾԳ (Բ), Զ (գ), ԶԱ (դ), ԶԸ (Բ) և այլն։ Նարեկացին Մատյանը դիմառնաբար ներկայացնում է որպես մի ձայնարկու, որ իր փոխարեն աստծու առջև միշտ պիտի խոստովանի բանաստեղծի մեղքերը։

Այս կացցէ սա՛ման յանձնառական խոստովանութեան՝
Մշտնջենաւոր ձայնարկու առաջի քոյ, ամենակալ...
(Բան ԾԳ, դ)

Անձնավորման այս փաստից բխում է մի այլ եզրակացություն. բանաստեղծն ինքն է մինչ այդ հանդես գալիս իբրև ձայնարկու։ Սա ակներև է նրա շափազանց կարևոր մի այլ խոստովանությունից։ Ի՞նչ գլխում նարեկացին հայտնում է, որ ինքը դիմում է ժողովրդական ողբի ձևին, հանգի օգտագործմանը՝ խոսքն ալիլի ազդու դարձնելու համար։

Ուստի եւ բաղմեալ իմ ի գլուխս պարու ակմբից դասու այնր երախանաց,

27 Մատյանի լրիվ վերնագիրն այսպես է. «Դրութիւնք յոգնաթխանձ բանից օգտակարաց ապաշաւանաց, հոգեշահ խրատոց անձին ստգտանաց, զղջականաց կանոնաց կեանաց, կամաւորութեամբ յանձնառութեանց, մեղանաց խոստովանութեանց, ցուցմունք զաղտնեաց, տարածմունք ձածկեցելոց, յանդիմանութիւնք թաղոցելոց, սպեղանիք զորաւորք՝ իրաց անբժշկականաց, դեղը ազդողականք՝ ցաւոց անտեսակոնաց. հնարաւորութիւնք բաղմամասնեայ երկանց վտանգից, ի դիմաց կարեաց ամենից բնութեանց առիթը տրտասոց, պատմաբ աղօթից ի խնդրոյ ալցման հարց միանձանց և բաղմաց անապատականաց առաջից։ Մատեանն ողբերգութեան Գրիգորի նարեկաց վանից վանականի»։

Որք զլաւեացն յեղանակեն բանաստեղծութիւն,
 Եւ ես ընդ նոսին՝ նոցին հեծութեամբ.
 Աւաղական ձայնարկութեամբ՝
 Հանձինս տարածանեմ զվշտակրութիւն:
 (Բա՛ն ԻՋ, ա)

Պարզ ասած՝ Նարեկացին ուզում է լալականների դասի պարագլխի նըման սզալ իր վշտերը: Դառնալ ձայնարկու, ողբասացների պարագլուխ, — սա ժողովրդական ոգուն մոտենալու ներքին պահանջ էր միայն, այլ նաև ժանրի նախընտրություն: Նվ, իսկապես, Նարեկացին Մատնանը մտահղացել է իբրև ողբ: Մա ալկներն է նաև Նրեմիայի ողբի և իր ողբի միջև տարված զուգահեռից.

Այլ ես պատմեմ աստուծոյ զարծեալ ոչ զմեղոն Երուսաղեմի,
 Ըստ մարգարէին հրամանադրեանն, որ առ ժողովորդն նախնի,
 Եւ կամ տանն Յակոբո՝ զանաբլնութիւնս նորա,
 Այլ իմոյս ժամանեցից յայտնութեան.
 Քանիւ առաջ ընդ աղէտս մա՛ռս յարելով, ըստ մարգարէին,
 Չանկմանցից զիս ինքն ինձէն իմովս ձայնիւ, ըստ սաղմոսողին,
 Որպէս զի յանձնառական յայտ: Համայնապաշտում խոստովանութենէ՝
 Իշ կարաւտացեալ կրկնակին՝
 Միանգամայն իսպառ սրբեցայց՝ արհնեալ հրամանաւ էիդ:
 (Բա՛ն ԼԲ, Բ)

Հուգահեռը թափանցիկ է. երկուսն էլ ողբում են՝ մարգարեն Երուսաղեմի, բանաստեղծն իր անձի մեղքերը: Երկուսն էլ ընտրել են գրական նույն ժանրը՝ ողբը: Դա ժողովրդի սիրած ժանրերից մեկն էր:

Ողբը պատկանում է համաշխարհային պրականության հնագույն ժանրերի թվին: Մագելով թաղման և սգի ժողովրդական երգերից, ողբն արդեն գրական ուրույն ժանր էր հունա-հույնական անտիկ գրականության մեջ: Ժանրի գրական զարգացման աղբյուրներից մեկն էլ Աստվածաշունչ գիրքն էր: Ժանրը հարատևում էր նաև բյուզանդական գրականության մեջ: Հայ մատենագրության մեջ մինչև Նարեկացին ողբը տվել էր դասական օրինակներ: Հիշենք Մովսես Խորենացու և Դավթակ Քերթովի ողբերը: Իբրև ժողովրդական բանահյուսության սիրված ժանր, ողբը կենդանի էր ոչ միայն Նարեկացու դարաշրջանում, այլև շատ դարեր անց: Անշուշտ. Նարեկացին ծանոթ էր նաև ողբի տեսական ըմբռնումներին: Այլ կերպ՝ առանց անցյալի գեղարվեստական ավանդույթների յուրացման և ստեղծագործական վերակերտման, նա չէր կարող հանգել այն նոր ձևին, որն առավելապես համապատասխաներ իր մտահղացման մարմնավորմանը: «Ժանրային ձևն անհնար է ըմբռնել նրա կենսական արմատներից դուրս. դարաշրջանի գաղափարական պայքարից, տվյալ գրողի ստեղծագործության բովանդակությունից և ոճից, գրական ավանդույթներից դուրս»²⁸, — գրել է Լ. Պ. Գրոսմանը:

Նարեկացու համար այդ ավանդույթները երեքն են. ա) աստվածաշնչական մարգարեությունները և այլ գրքեր, բ) ազգային գրականությունը՝ ողբեր, ապաշխարության շարականներ և այլն, գ) ժողովրդական լայնաց և այլ երգեր: Ողբն ընդգրկում է կյանքի լայն ոլորտ և հնարավորություն է ընձեռում արձագանքելու ժամանակի հրատապ խնդիրներին, ժողովրդի հասարակական քաղաքական բաղձանքներին ու տրամադրություններին: Հեղինակը կարող է անկաշկանդ բացահայտել իր ներաշխարհը, արտահայտել իր խոհերն ու զգացմունքները, իր հուզական վերաբերմունքը: Ահա թե ինչու ողբի ժանրի մեջ Նարեկացին գտել է իրեն հուզող մտքերն ու հույզերը արտահայտելու գեղարվեստական ամենակատարյալ ձևը: Նարեկացին նոր կերպարանք է տվել

²⁸ Л. П. Гроссман. Поэтика Достоевского. М., 1925, с. 15.

ձուլված ևն ժամանակի հասարակական ապականվածության, բարքերի անկման քննադատության շիկացած կրքին, ուր անհատի ճակատագրի ողբերգական վիճակից նա նայում է ժողովրդի ճակատագրի ողբերգականությանը՝ հույսի շող որոնելով անհայտ գալիքում: «Իր քնարական էջերեն ոմանց մեջ,— գոհ է Ա. Չոպանյանը խորենացու մասին,— Նարեկացիական ոճին իսկ նախագիծը տված է»⁵²: Կարելի է ավելացնել՝ ոճի և ողբի նախագիծը:

Զգտելով ապացուցել, որ Մատյանը մտահղացվել է որպես ողբ, մենք հեռու ենք այդ երկը միջնադարյան ողբերի շարքը դասելուց: Մատյանը միանգամայն ինքնատիպ ստեղծագործություն է. հենց ինքն է իր գրական ժանրը: Մատյանը չունի ո՛չ իր նախորդը և ո՛չ էլ իր հետնորդը՝ ուղղակի իմաստով: Դա համադրական երկ է, և Նարեկացին չէր լինի իսկապես մեծ ու համապարփակ, եթե նրա ստեղծագործության մեջ չավարտվեր հինը և չսկզբնավորվեր այն նորը, որ պիտի դառնար անձնական քնարերգության մայրուղի հայ գրականության մեջ: Գեղարվեստական երկը չի կարող ստեղծվել նախապես տրդված պատրաստի ձևերով: Նրա արարչագործությունը լարված որոնումների, բառի ու պատկերի ստեղծման հարաշարժ ընթացք է՝ մտքերի ու զգացմունքների բուռն հորձանք: Հանճարը միշտ էլ ժանրերը վերածնունդ է բառ իր ստեղծագործական տարրերի: Այդպես է վարվել նաև Նարեկացին: Նա ստեղծել է ուրույն ժանրի մի երկ, որը պայմանականորեն միայն պիտի դասել խոհանարարական քնարական պոեմների շարքը:

ЖАНРОВАЯ ПРИРОДА «КНИГИ СКОРБНЫХ ПЕСНОПЕНИЙ» ГРИГОРА НАРЕКАЦИ

А. А. КАЗИНЯН

Резюме

Богата и сложна жанровая система средневековой армянской литературы. Жанры возникают на определенной стадии развития литературы и, сохраняя свои существенные признаки, постоянно видоизменяются в зависимости от эстетических и художественных потребностей той или иной эпохи. Цель настоящей статьи — определение жанровой природы «Книги скорбных песнопений» Григора Нарекаци (951—1003), величайшего поэта армянского средневековья. Это гениальное поэтическое творение считалось то молитвенником, то элегией, то плачем, то мистическим повествованием, то похвальным словом, то лирической или философской поэмой и т. д. Мы приходим к выводу, что каждое из этих определений в отдельности неверно с точки зрения истории развития жанра. «Книга скорбных песнопений» была задумана как плач, жанровые образцы которого имеются как в Библии (плачи пророков) и предшествующей Нарекаци армянской литературе (плач Мовсеса Хоренаци и других), так и в устном народном творчестве. Она имеет своеобразную, присущую только ей жанровую природу: это синкретическое произведение, в котором сплетаются разные жанры средневековой литературы, и лишь условно его можно назвать лирико-философской поэмой.

⁵² Ա. Չոպանյան, Գրական ու մարդը Մովսես Խորենացիի մեջ. — «Անահիտ», Փարիզ, 1931, № 1—2, էջ 10: